

F. REGJISTRI I KREDIVE

1. INFORMACION I PËRGJITHSHËM

Viti 2010 mund të cilësohet si një vit i suksesshëm dhe i larmishëm për ecurinë e funksionimit të Regjistrit të Kredive në Bankën e Shqipërisë. Në fund të vitit, në një kohë kur shënohen tre vite të operimit të tij, janë raportuar të dhënat e pothuajse të gjithë kredimarrësve në Republikën e Shqipërisë. Bilanci më i fundit numëron rreth 540.000 kredi të raportuara në total, nga të cilat rreth 260.000 janë kredi aktive dhe pjesa tjetër të mbyllura përgjatë këtyre tre viteve.

Të pasurit e një informacioni shtesë dhe të besueshëm qoftë pozitiv apo negativ për klientët, është një element mjaft i rëndësishëm në procesin e vendimmarrjes për një kredi të caktuar apo të vlerësimit të performancës së tij përgjatë kohëzgjatjes së kredisë. Ky informacion, po përdoret çdo ditë e më shumë nga raportuesit e të dhënave dhe po i shërben atyre në vendimmarrje. Të dhënat mbi numrin e kërkimeve tregojnë një rritje të përdorimit të informacionit të Regjistrit të Kredive nga viti në vit.

Tabelë 39. Numri i kredive të reja të disbursuara në Regjistrin dhe numri i kërkimeve të realizuara nga subjektet e Regjistrit të Kredive.

	Numri kredive të reja të disbursuara	Kërkime në Regjistrin e Kredive
Viti 2008	128,682	88,875
Viti 2009	92,719	171,146
Viti 2010	128,278	198,229
Viti 2010		
Bankat ¹	98,752	192,989
Subjektet financiare jobanka dhe USHKK-të	29,526	5,240

¹ Përfshirë Bankën e Shqipërisë.

Burimi: Banka e Shqipërisë.

Duke marrë në konsideratë shifrat, përgjatë tre viteve historik, vërehet një rritje e numrit të kredive aktive (ende të pamaturuara) të raportuara në sistem. Me të njëjtën prirje shfaqet edhe teprica e mbetur e tyre.

Tabelë 40. Numri i kredive të raportuara në Regjistrin e Kredive sipas viteve.

	Numri i kredive aktive
Viti 2008	262,368
Viti 2009	291,137
Viti 2010	320,813

Viti 2010	Numri i kredive aktive
Bankat tregtare	263,591
Subjektet jobanka dhe USHKK-të	57,222

Burimi: Banka e Shqipërisë.

Në këtë aspekt, pjesë integrale e punës së përditshme të Regjistrin të Kredive në Bankën e Shqipërisë, është edhe procesi i nxjerrjes së Raportit të Kredimarrësit apo procesi i rishikimit të të dhënave të kredimarrësve. Me qëllim ardhjen në ndihmë të personave me vendbanim në zona të largëta jashtë Tiranës, risi gjatë vitit 2010 ishte edhe përfshirja në këtë proces si ndërmjetëse, edhe e pesë degëve të Bankës së Shqipërisë në rrethe. Sot, degët e Bankës së Shqipërisë kanë caktuar stafin përkatës që ndjek këtë proces dhe që komunikon me Zyrën e Regjistrin të Kredive në Tiranë.

Tabelë 41. Numri i kërkesave për Raportin e Kredimarrësit dhe numri i kërkesave për rishikimin e të dhënave në Regjistrin e Kredive sipas viteve.

	Kërkesa për raport kredimarrësi	Kërkesa për rishikim
Viti 2008	139	34
Viti 2009	198	15
Viti 2010	368	13

Burimi: Banka e Shqipërisë.

Informacioni i gjeneruar nga Regjistri i Kredive i shërben edhe vetë Bankës së Shqipërisë për qëllime analize dhe inspektimi në vend. Gjenerimi i raporteve të ndryshme periodike kryhet në funksion të një procesi mbikëqyrës të rrezikut të kredisë në nivele sa më optimale.

2. NDRYSHIME NË KUADRIN RREGULLATIV

Përgjatë vitit 2010 rishikimi i kuadrit rregullativ, ka qartësuar shumë momente, të cilat përveç se lidhen me pjesën operacionale dhe mbikëqyrëse të punës, përkojnë edhe me përfshirjen e subjekteve të reja raportuese në Regjistër.

Konkretisht, Banka e Shqipërisë ka miratuar kuadrin e përditësuar të plotë rregullativ në lidhje me regjistrin e kredive që përbëhet nga: rregullorja nr.67, datë 13.10.2010 "Mbi përmbajtjen e informacionit dhe funksionimin e Regjistrin të Kredive në Bankën e Shqipërisë"; udhëzimi nr. 68, datë 13.10.2010 "Për procedurën e nxjerrjes së raportit të kredimarrësit dhe rishikimin e të dhënave që mbahen në Regjistrin e Kredive"; vendimi nr.69, datë 13.10.2010 "Për miratimin e tarifave të përdorimit të informacionit

që mbahet në Regjistrin e Kredive në Bankën e Shqipërisë”; udhëzimi nr. 70, datë 13.20.2010 “Mbi funksionimin e Regjistrit të Kredive në Bankën e Shqipërisë” si dhe urdhërin nr.9431, datë 05.11.2010 “Për miratimin e të dhënave dhe llojit të informacionit që raportohet në Regjistrin e Kredive në Bankën e Shqipërisë”.

3. PROCESI I PËRFSHIRJES SË SUBJEKTEVE FINANCIARE JOBANKA DHE SHOQËRIVE TË KURSIM-KREDITIT DHE UNIONEVE TË TYRE NË REGJISTRIN E KREDIVE

Në fokus të punës, përgjatë vitit 2010 ishte përfshirja në Regjistrin e Kredive, si raportuese të të dhënave edhe subjekteve të tjera jobanka që ushtrojnë aktivitetin e kredihënies. Informacioni që zotëronin këto subjekte i mungonte tregut bankar, por nga ana tjetër, vetë subjektet jobanka përballeshin çdo ditë me mungesën e informacionit për klientët që aplikonin për kredi pranë tyre. Në nëntor 2010, pesë subjekte të reja rritën në 22 listën e raportuesve të të dhënave në Regjistrin e Kredive të Bankës së Shqipërisë për rrjedhojë, edhe të vëllimit të informacionit të raportuar. Më konkretisht:

Fondi Besa sh.a.;
Opportunity Albania sh.a;
Vision Fund Albania sh.p.k;
Unioni i Shoqërive të Kursim- Kreditit “Jehona”;
Unioni i Shoqërive të Kursim -Kreditit “Unioni Shqiptar Kursim Kreditit”.

Përgjatë kësaj periudhe, paralelisht me punën për përfshirjen e subjekteve jobanka që ushtrojnë aktivitetin e kredihënies në Regjistrin e Kredive, është punuar për fillimin e procesit testues të të dhënave të raportuara edhe nga subjektet që ushtrojnë aktivitetin e qiradhënies financiare. Aktualisht, janë 6 (gjashtë) subjekte financiare jobanka që kryejnë aktivitetin e qirasë financiare të cilat janë angazhuar së fundmi për të plotësuar kërkesat bazë të Regjistrit të Kredive. Këto subjekte pritet të jenë pjesë e Regjistrit të Kredive si subjekte raportuese të tij brenda muajit qershor 2011.